

SEKITAR RAMADAN

TAJAJAN RAMADAN

Peniaga OTH sumbang sajian kepada keluarga memerlukan

► **SHAHIDA SARHID**
ssshahida@sph.com.sg

MENYUMBANG kembali kepada masyarakat memang sesuatu yang sudah mendarah daging dalam jati diri pemilik Deli Maslina, Cik Adibah Ahmad Don.

Menurutnya sejak kedai menjual kuih itu bermula sekitar 35 tahun yang lalu oleh ibu bapanya – Encik Ahmad Mohd Don dan Cik Maskiah Shariff – syarikat tersebut telah pun mula menyumbang kembali kepada masyarakat dengan menaja kuih-muih kepada mereka yang kurang berkemampuan.

“Apabila orang datang kepada kita untuk meminta tajaan bagi membantu mereka yang memerlukan, selalunya kita akan bersetuju dan mengambil bahagian.

“Inilah cara kita menyumbang kembali kepada masyarakat,” ujar usahawannya berusia 36 tahun itu.

Beliau merupakan generasi kedua yang mengendalikan syarikat tersebut yang memang terkenal kerana menjual kuih-muih tradisional seperti kuih bakar, nagasari, kuih jongkong, kuih koci dan puteri salat.

Justeru apabila pihak pengurusan Our Tampines Hub (OTH) bertanya sama ada mereka mahu mengambil bahagian dalam inisiatif ‘Pay It Forward’, Cik Adibah tidak berfikir dua kali dan terus bersetuju.

Inisiatif tersebut yang diperkenalkan buat pertama kali oleh OTH bertujuan untuk membantu 300 keluarga memerlukan yang tinggal di GRC Tampines sepanjang bulan Ramadan ini.

Menjelaskan mengapa OTH memilih untuk memperkenalkan inisiatif ini, Pengurus Kanan (Komunikasi dan Pemasaran) OTH, Cik Nur Asyikin Ismail, berkata:

“Bulan Ramadan ini merupakan bulan yang sesuai untuk kita berfikir sejenak terhadap mereka yang memerlukan dalam masyarakat.

“Mereka mungkin sebelum ini tidak berupaya untuk menikmati segala sajian makanan dan minuman yang terdapat di OTH.

“Justeru inilah masa kita untuk memberikan peluang itu kepada mereka agar mereka juga sama-sama dapat menikmati apa yang ditawarkan di hab ini,” katanya.

Di antara 13 April dengan 10 Mei, lebih 1,160 paket makanan akan diermakan oleh 11 penyewa makanan dan minuman OTH sebagai menyokong projek terbaru ini.

Selain Deli Maslina, antara penyewa lain yang turut mengambil bahagian termasuk Crave, Saap Saap Thai, Rumah Minang, Subway, Wok Hey, Express by Papparich, Tenderfresh, Al Barakah, Qiji, dan Curry & Spize.

Para penerima akan menerima surat yang boleh mereka mendapatkan kupon di kaunter khidmat pelanggan dekat OTH.

Kupon tersebut boleh digunakan di sebarang 11 kedai makanan dan minuman untuk mendapatkan makanan pilihan mereka.

Deli Maslina misalnya akan memberikan dua jenis botol kuih iaitu kuih ‘cornflakes’ dan biskut kacang.

Restoran Express by Papparich pula akan memberikan sajian makanan



PENCUCI MULUT: Cik Adibah Ahmad Don dengan dua jenis botol kuih iaitu kuih ‘cornflakes’ dan biskut kacang yang ditaja kepada mereka yang kurang berkemampuan. – Foto-foto BH oleh LIM YAOHUI

signature mereka, nasi lemak dengan peha ayam.

Menurut Ketua Eksekutif (Rantau Asia), Encik Sebastian Low, 42 tahun, syarikatnya tidak mengira latar belakang, bangsa atau agama dalam memberi sumbangan kepada masyarakat.

“Kehidupan di Singapura yang berbilang bangsa dan agama secara tidak langsung membuat kami mahu menyumbang kepada sesiapa sahaja.

“Semasa Ramadan tahun lalu juga, kami telah menyumbang makanan kepada para kakitangan hospital yang berada di barisan hadapan menentang pandemik Covid-19,” ujarnya.

Express by Papparich yang baru sahaja membuka cawangan tersebut di OTH sekitar enam bulan lalu berkata mereka mengalu-alukan usaha penganjur dalam membolehkan syarikat seperti menyumbang kepada mereka yang memerlukan di kawasan Tampines.

“Kami tidak mengharapkan apa-apa sebagai balasan. Hanya kami harapkan usaha ini akan membantu golongan penerima terutama semasa bulan Ramadan ini dan memberi sinar kegembiraan kepada mereka,” kata Encik Low lagi.



GUNA KUPON: Di Restoran Express by Papparich, kupon yang diberi kepada penerima tajaan boleh ditukar dengan sajian makanan ‘signature’ mereka, nasi lemak dengan peha ayam yang ditunjukkan oleh Ketua Eksekutif (Rantau Asia), Encik Sebastian Low.